

Na osnovu člana 127 Zakona o srednjem obrazovanju ("Službene novine Tuzlanskog kantona", broj: 17/11) i člana 13, stav 1, alineja 1, a u vezi sa članom 64 Pravila JU Behram-begove medrese u Tuzli, Školski odbor JU Behram-begove medrese u Tuzli, na svojoj 2. redovnoj sjednici, održanoj dana 20. aprila 2012. god. donio je

PRAVILNIK

o disciplinskoj i materijalnoj odgovornosti učenika JU Behram-begove medrese

I. OPĆE ODREDBE

Član 1.

Ovim Pravilnikom utvrđuju se: povrede discipline i postupak za utvrđivanje disciplinske odgovornosti učenika JU Behram-begove medrese u Tuzli (u daljem tekstu: Medresa), organi za izricanje mjera, pedagoške mjere, postupak za ukidanje i ublažavanje odgojno-disciplinskih mjera, materijalna odgovornost učenika i način utvrđivanja materijalne štete nanesene Medresi, kao i druga pitanja vezana za rad stručnih organa i organa upravljanja, njihove nadležnosti i način rada u disciplinskom postupku.

II. DISCIPLINSKA ODGOVORNOST

Član 2.

Za ponašanje koje narušava ugled Medrese i koje je suprotno općim normativnim aktima Medrese učenik odgovara disciplinski.

Učenik je odgovoran za povredu discipline koja je nastala kao posljedica njegove krivice ili nepažnje. Disciplinska odgovornost učenika je nezavisna od drugih oblika odgovornosti (krivična, prekršajna), odnosno jedna drugu ne isključuju. Oslobođanje od krivične odgovornosti, odnosno odgovornosti za prekršaj ne predstavlja oslobođanje odgovornosti za povrede discipline, ako je izvršeno djelo propisano kao povreda discipline.

Sumnja u pogledu postojanja činjenica koje čine obilježje povrede discipline, ili utiču na utvrđivanje disciplinske odgovornosti učenika, razmatrat će se na način koji je povoljniji za učenika protiv koga se vodi disciplinski postupak.

II.I. ODGOJNO-DISCIPLINSKE POVREDE

Član 3.

Odgojno-disciplinske povrede predstavljaju svaki akt učenika koji je štetan po interese Medrese, koji je suprotan općim normativnim aktima Medrese i zbog kojih se vodi disciplinski postupak i izriče disciplinska mjera.

Član 4.

Odgojno-disciplinske povrede, s obzirom na posljedice koje uzrokuju, mogu biti lakše i teže.

Kao lakše povrede discipline smatraju se:

- neopravdano zakašnjavanje ili izostajanje sa nastave do pet nastavnih sati, neopravdano izostajanje do pet korepeticija ili pet evidentiranih neopravdanih izostanaka s namaza u džematu Medrese, u toku školske godine;
- ometanje nastave ili korepeticije u svom ili drugom odjeljenju;
- nedolično ponašanje;
- izbjegavanje učešća u medresanskim manifestacijama i drugim planiranim aktivnostima koje se realiziraju u Medresi;
- druge povrede istog stepena utvrđene odlukama organa Medrese i drugim aktima Medrese.

Kao teže povrede discipline smatraju se:

- prepravka podataka u svjedočanstvu, diplomi ili drugim javnim ispravama,

- prepravka ili dopisivanje podataka u evidenciju koju vodi škola,
- političko organizovanje ili djelovanje učenika u školi,
- krađa školske i učeničke imovine,
- davanje ili upotreba alkohola i narkotičkih sredstava u školi ili u školskom dvorištu, kao i podstrekivanje na njihovu upotrebu,
- vršnjačko nasilničko ponašanje,
- nasilničko ponašanje i omalovažavanje nastavnika i ostalih zaposlenika škole,
- posjedovanje oružja,
- izražavanje nacionalne i vjerske netrpeljivosti,
- neopravdano izostajanje sa nastave i drugih oblika obrazovno-odgojnog rada 30 i više časova,
- zloupotreba mobilnog telefona ili drugih elektronskih uređaja u toku nastavnog procesa,
- namjerno oštećenje ili uništenje školske imovine i
- lažne dojave o podmetnutim eksplozivnim sredstvima u prostoru škole.
- omalovažavanje islamskih propisa i zanemarivanje islamskih dužnosti;
- ponašanje koje odudara od prakse hanefijskog mezheba;
- nepristojno ponašanje prema zaposlenicima i saradnicima Medrese, kao i predstavnicima organa Islamske zajednice u BiH;
- nemoralno ponašanje, blud i radnje koje prethode bludu;
- konzumiranje alkoholnih pića i zalaženje i boravak u lokalima u kojima se toče alkoholna pića;
- jedenje svinjskog mesa i prerađevina od svinjskog mesa;
- konzumiranje droge i drugih opojnih sredstava, te pušenje u objektima Medrese;
- kockanje, klađenje i druge vrste hazardnih igara;
- nepristojno odijevanje i odijevanje koje nije usklađeno s Pravilnikom o kućnom redu Medrese;
- prisvajanje tuđe imovine (krađa);
- psovka, potvora, vrijeđanje i klevetanje i drugi oblici kršenja šerijatskih zabrana;
- samovoljno napuštanje zajedničkih namaza u džematu Medrese;
- nepristojno ponašanje na ulici i na drugim javnim mjestima;
- izazivanje nereda i tuče u Medresi i izvan Medrese i učestvovanje u istim;
- učestalo ponavljanje lakših povreda discipline;
- nepoštivanje odluka organa upravljanja i rukovođenja Medresom i
- svako ponašanje koje šteti ugledu Medrese i Islamske zajednice u BiH;
- druge povrede istog stepena utvrđene odlukama organa Medrese i drugim aktima Medrese.

Učenik može biti disciplinski odgovoran samo za povredu discipline utvrđenu ovim Pravilnikom.

II. II. PEDAGOŠKE MJERE

Član 5.

Za lakše povrede discipline učeniku Medrese mogu se izreći sljedeće pedagoške mjere:

- ukor razrednika,
- ukor razrednog vijeća,
- ukor direktora.

Za teže povrede discipline izriče se jedna od sljedećih pedagoških mjera:

- ukor direktora,
- ukor Nastavničkog vijeća,
- premještaj u drugo odjeljenje
- isključenje iz Medrese.

Pedagoška mjera "isključenje iz Medrese" može se izreći kada izricanje ostalih pedagoških mjera nije pozitivno djelovalo, ili kada teža povreda discipline naročito ugrožava interese i ugled Medrese.

Za teže povrede discipline mogu se izreći i pedagoške mjere predviđene ovim Pravilnikom za lakše

povrede discipline, ukoliko postoje naročito olakšavajuće okolnosti, ili je povreda učinjena iz nehata, ili ukoliko se i sa ovim mjerama može postići svrha izricanja pedagoške mjere.

Član 6.

Povrede discipline iz člana 4. stav 3. alineja 13. ovog Pravilnika, povlače sljedeće pravne posljedice:

- od 6 do 12 neopravdanih izostanaka - vladanje "vrlo dobro";
- od 13 do 18 neopravdanih izostanaka - vladanje "dobro";
- od 19 do 25 neopravdanih izostanaka - vladanje "zadovoljava";
- od 26 do 30 neopravdanih izostanaka - vladanje "loše";
- 31 i više neopravdanih izostanaka - vladanje "loše" (isključenje iz Medrese).

Zbog samovoljnog napuštanja nastave izrečena mjera može biti i strožija pogotovu ukoliko je učenik podstrekivao druge učenike da napuste nastavu, ili je svojim postupcima onemogućio održavanje nastave u odjeljenju ili Medresi.

Član 7.

Prilikom odmjerenja i izricanja pedagoške mjere uzeće se u obzir sve okolnosti koje utiču da pedagoška mjera bude manja ili veća (olakšavajuće i otežavajuće okolnosti), a naročito: stepen odgovornosti, pobude iz kojih je povreda učinjena, posljedica učinjene povrede, okolnosti pod kojima je povreda učinjena, ranije ponašanje učenika, njegove lične prilike, ponašanje nakon učinjene povrede i druge okolnosti koje se odnose na ličnost učenika koji je učinio povredu discipline.

Potrebno je obezbijediti da izrečena mjera ostvari cilj odgoja i odgojno utječe na učenika, kako bi svoje ponašanje uskladio s normama ponašanja utvrđenim općim normativnim aktima Medrese.

II.III. DISCIPLINSKI POSTUPAK

Član 8.

Za povrede discipline, predviđene ovim Pravilnikom, postupak u prvom stepenu vodi razrednik/razredni odgajatelj.

Za lakše povrede discipline pedagošku mjeru izriče razrednik, razredno vijeće i direktor.

Po žalbi na odluku iz prethodnog stava, odluku donosi Nastavničko vijeće i ona je konačna i izvršna, te protiv iste žalba nije dopuštena.

Za teže povrede discipline pedagošku mjeru izriče direktor i nastavničko vijeće.

Po žalbi na odluku iz prethodnog stava, odluku donosi Školski odbor i ona je konačna i izvršna, te protiv iste žalba nije dopuštena.

Član 9.

Svako ima pravo prijaviti povredu discipline učenika.

Prijava se podnosi pismeno ili usmeno. Ukoliko se prijava podnosi usmeno, sačinice se zapisnik, a ako je prijava upućena telefonom sačinice se službena zabilješka.

Član 10.

Nakon prijema prijave razmotrit će se osnovanost iste i odlučiti o pokretanju disciplinskog postupka.

Disciplinski postupak se pokreće prijedlogom za izricanje disciplinske mjere, kojeg može podnijeti:

- razrednik ili odgajatelj;
- grupa do najmanje 5 profesora Medrese;
- razredno vijeće;
- nastavničko vijeće;
- direktor Medrese.

Član 11.

Prijedlog za za izricanje pedagoške mjere podnosi se u pismenoj formi i sadrži:

- naziv podnosioca;
- ime i prezime učenika;
- razred i odjeljenje koji učenik pohađa;

- činjenični opis povrede discipline;
- potpis podnosioca.

Uz prijedlog za za izricanje pedagoške mjere predlažu se dokazi, ako ih ima.

Član 12.

Postupak utvrđivanja disciplinske odgovornosti učenika pokreće se najkasnije u roku od petnaest dana od dana saznanja za povredu.

Istekom roka iz predhodnog stava nastupa zastara za pokretanje postupka.

Član 13.

Prijedlog za za izricanje pedagoške mjere dostavlja se razredniku učenika protiv kojeg se vodi disciplinski postupak.

Član 14.

Razrednik je dužan da, u roku od 8 dana od dana prijema prijedloga za izricanje pedagoške mjere, postupi po prijedlogu podnosioca, u kom smislu:

- vrši saslušanje učenika protiv kojeg se vodi postupak;
- utvrđuje činjenično stanje;
- utvrđuje pravnu kvalifikaciju disciplinske povrede;
- određuje se u pogledu odgovornosti učenika protiv kojeg se vodi postupak, u smislu odredbi ovog Pravilnika;
- konstatuje i evidentira olakšavajuće i otežavajuće okolnosti;
- donosi odluku o obustavljanju postupka, ili izricanju pedagoške mjere, ili predmet dostavlja organu Medrese nadležnom za izricanje odgojno-disciplinske mjere.

Član 15.

O saslušanju učenika protiv kojeg se vodi postupak razrednik je dužan sačiniti zapisnik.

Zapisnik iz prethodnog stava ovog člana potpisuje razrednik, razredni odgajatelj i učenik protiv kojeg se vodi postupak.

Član 16.

Sumnja u pogledu postojanja disciplinske povrede se temelji na činjenicama koje su utvrđuju dokazima. Samo dokazane činjenice su relevantne za utvrđivanje disciplinske odgovornosti.

Postupak prikupljanja i ocjene dokaza vrši razrednik.

U disciplinskom postupku, u smislu odredbi ovog Pravilnika, dokazom se može smatrati:

- neposredno opažanje okolnosti ili stvari, konstatovano zapisnički;
- iskazi svjedoka dati na zapisnik;
- isprave i dokumenti;
- ostali zakoniti dokazi.

Član 17.

Učeniku protiv kojeg se vodi postupak daće se mogućnost da sačini pisanu izjavu, u koju ima pravo unijeti sve činjenice koje smatra relevantnim za postupak, te uz istu može priložiti sve dokaze kojima potkrepljuje svoje navode.

Član 18.

Organ koji izriče disciplinsku mjeru može utvrditi drugačiju pravnu kvalifikaciju povrede od one koju je utvrdio organ koji je vodio postupak.

Organ koji izriče disciplinsku mjeru može se drugačije odrediti u pogledu postojanja disciplinske odgovornost u odnosu na organ koji je vodio postupak.

Organ koji izriče disciplinsku mjeru može se drugačije odrediti u pogledu utvrđenog činjeničnog stanja koje je utvrdio organ koji je vodio postupak.

Član 19.

Prilikom odmjeravanja i izricanja disciplinske mjere organ koji izriče disciplinski postupak uzeće u obzir

sve okolnosti koje utiču da disciplinska mjera bude manja ili veća (olakšavajuće i otežavajuće okolnosti), u smislu odredbe člana 7 ovog Pravilnika.

Član 20.

Ako se u postupku utvrdi da učinjeni disciplinski prekršaj izaziva neznatnu posljedicu, ili je odgovornost počinioca naročito malog stepena, učenik se može osloboditi od disciplinske odgovornosti.

Član 21.

Organ nadležan za izricanje pedagoške mjere odluku o izrečenoj mjeri donosi natpolovičnom većinom od ukupnog broja članova tog organa.

Član 22.

Odluka o disciplinskoj odgovornosti može biti:

- utvrđuje se disciplinska odgovornost učenika za lakšu ili težu disciplinsku povredu i izriče se jedna od pedagoških mjera;
- učenik se oslobađa disciplinske odgovornosti zbog nepostojanja elemenata disciplinske povrede, nepostojanja krivice ili nehata i nedostatka dokaza, te zbog neznatnosti utvrđene odgovornosti ili izazvane posljedice.

Član 23.

Odluka o disciplinskoj odgovornosti sadrži: uvod, izreku i obrazloženje.

U uvodu odluke o disciplinskoj odgovornosti navode se podaci o organu koji donosi odluku, pravni osnov i datum donošenja odluke.

U izreci odluke o disciplinskoj odgovornosti se navode lični podaci učenika, podaci o odgovornosti učenika, pravni naziv prekršaja i pedagoška mjera, ukoliko je učenik oglašen odgovornim.

U obrazloženju odluke o disciplinskoj odgovornosti se detaljno iznosi činjenično stanje (opis povrede), koje se činjenice smatraju dokazanim, na osnovu kojih dokaza, kao i razlozi kojima se rukovalo prilikom određivanja pedagoške mjere.

Član 24.

O izrečenoj odgojno-disciplinskoj mjeri "ukor direktora", "ukor Nastavničkog vijeća", "premještaj iz jednog u drugo odjeljenje Medrese" i "isključenje iz Medrese", donosi se odluka u formi rješenja.

Rješenje o izrečenoj odgojno-disciplinskoj mjeri potpisuje direktor Medrese.

Po jedan primjerak odluke o disciplinskoj odgovornosti i izrečenoj pedagoškoj mjeri se dostavlja roditelju odnosno staratelju učenika i učeniku.

Član 25.

Učenik, roditelj, odnosno staratelj učenika mogu podnijeti žalbu drugostepenom organu na izrečenu odgojno-disciplinsku mjeru.

Žalba se podnosi odgovarajućem organu Medrese, shodno odredbi člana 7 ovog Pravilnika, u roku od 3 dana od dana prijema rješenja o izricanju pedagoške mjere.

Žalba na odluku o isključenju učenika iz Medrese odlaže izvršenje rješenja do donošenja drugostepene odluke.

Izuzetno, učenik kome je izrečena mjera isključenje iz Medrese, može biti udaljen iz Medrese i prije donošenja drugostepene odluke, ako negativno utiče na ostale učenike i ometa rad u Medresi, o čemu se donosi posebno rješenje, koje potpisuje direktor Medrese, a dostavlja se roditelju odnosno staratelju učenika i učeniku.

Drugostepeni organ je dužan u roku od 15 dana od dana prijema žalbe donijeti drugostepenu odluku.

Odluka drugostepenog organa po žalbi učenika, odnosno roditelja/staratelja učenika je konačna.

Član 26.

Odgojno-disciplinske mjere važe za školsku godinu u kojoj su izrečene, a mogu se ublažiti ili ukinuti u toku školske godine, ako cjelokupno ponašanje učenika, poslije izrečene odgojno-disciplinske mjere, na to upućuje.

Izuzetak od odredbe prethodnog stava ovog člana je učenik koji je imao ocjenu vladanja loše na kraju školske godine.

Član 27.

Odluku o ublažavanju, odnosno ukidanju pedagoške mjere donosi organ koji je tu pedagošku mjeru izrekao.

Prijedlog za ublažavanje, odnosno ukidanje pedagoške mjere može podnijeti razredno vijeće, Nastavničko vijeće, razrednik ili odgajatelj i direktor Medrese.

Organ nadležan za ublažavanje, odnosno ukidanje pedagoške mjere, dužan je odluku po prijedlogu za ublažavanje, odnosno ukidanje pedagoške mjere, donijeti u roku od 15 dana od dana prijema prijedloga. Odluka o ublažavanju, odnosno ukidanju pedagoške mjere "ukor direktora", "ukor Nastavničkog vijeća", "premještaj iz jednog u drugo odjeljenje Medrese" i "isključenje iz Medrese" donosi se u formi rješenja. Rješenje se dostavlja učeniku i roditelju - staratelju učenika.

Član 28.

Na rješenje o ublažavanju, odnosno ukidanju pedagoške mjere može se izjaviti žalba.

Žalba se izjavljuje neposredno višem nadležnom organu od organa koji je odlučivao o ublažavanju, odnosno ukidanju pedagoške mjere.

Odluka drugostepenog organa po žalbi je konačna.

Član 29.

Izrečena odgojno-disciplinska mjera povlači snižavanje ocjene iz vladanja učenika, kako slijedi:

- ukor razrednika ili odgajatelja - ocjena iz vladanja "vrlo dobro",
- ukor razrednog vijeća – ocjena iz vladanja "dobro",
- ukor direktora - ocjena iz vladanja "zadovoljava",
- ukor nastavničkog vijeća - ocjena vladanja "loše".
- premještaj u drugo odjeljenje – ocjena iz vladanja „loše“
- isključenje iz Medrese - ocjena iz vladanja "loše".

Učenik koji je imao ocjenu iz vladanja loše na kraju školske godine ne može sljedeće školske godine biti redovan učenik Medrese

Učenik IV razreda koji je imao ocjenu iz vladanja loše ne može pristupiti polaganju mature u redovnim rokovima.

Smanjenje ocjene iz vladanja vrši se poslije pravosnažnosti izrečene pedagoške mjere.

Izrečena i pravosnažna pedagoška mjera evidentira se u učeničku knjižicu i odgovarajuću razrednu knjigu.

IV. MATERIJALNA ODGOVORNOST

Član 30.

Za materijalnu štetu, koju je učenik namjerno nanio Medresi, odgovaraju učenik i roditelji, odnosno staratelji učenika koji je prouzrokovao štetu.

Član 31.

Za evidentiranje materijalne štete manje vrijednosti nadležan je razrednik ili odgajatelj, a za evidentiranje materijalne štete veće vrijednosti nadležna je tročlana komisija, kao prvostepeni organ.

Komisiju iz prethodnog stava imenuje Školski odbor Medrese, na početku školske godine za tekuću školsku godinu. Tijela nadležna za evidentiranje štete, iz prethodnog stava, dostavljaju zapisnik o šteti direktoru Medrese koji donosi odluku o odgovornosti učenika za štetu i visini naknade štete.

Prigovor na odluku razrednika ili komisije za utvrđivanje materijalne štete podnosi se Školskom odboru Medrese, kao drugostepenom organu, u roku od 3 dana od dana dostavljanja odluke roditelju odnosno staratelju učenika.

Član 32.

Visina štete utvrđuje se prema knjigovodstvenoj vrijednosti oštećene ili uništene stvari.

Ako se nastala šteta ne može po tom osnovu utvrditi, onda nadležni organ utvrđuje istu u paušalnom iznosu, rukovodeći se tržišnom cijenom iste ili slične stvari.

Ako je štetu prouzrokovalo više učenika, svaki učenik je odgovoran za dio štete koju je prouzrokovao.

Ako se za svakog učenika ne može utvrditi odgovornost za nastalu štetu smatra se da su svi učenici podjednako odgovorni i štetu nadoknađuju u jednakim dijelovima.

Član 33.

Ako roditelji učenika ne nadoknade štetu utvrđenu odlukom nadležnog organa, Medresa će pokrenuti postupak protiv roditelja, odnosno staratelja učenika za naknadu štete pred nadležnim sudom.

V. ZAVRŠNE ODREDBE

Član 34.

Ovaj Pravilnik stupa na snagu danom objavljivanja na oglasnoj tabli Medrese.

JU Behram-begova medresa u Tuzli
Školski odbor

Broj: 01-02-1-237/12

Datum: 4. maj 2012.

Predsjednik Školskog odbora:
